

TPM: Ahli akademik perlu hasil lebih banyak penemuan baru
The Malaysian Insider
10 Oktober , 2011
Oleh Syed Mu'az Syed Putra

KUALA LUMPUR, 10 Okt — Tan Sri Muhyiddin Yassin menyeru ahli-ahli akademik untuk menyahut seruan kerajaan yang menjadikan 2012 sebagai tahun Gerakan Inovasi Nasional.

Timbalan Perdana Menteri berkata ahli-ahli akademik perlu sentiasa berada di barisan paling hadapan dalam mencetuskan idea-idea baru yang dapat menghasilkan penemuan dan penciptaan baru yang bernilai komersial.

“Pengumuman Perdana Menteri Datuk Seri Najib Razak dalam Bajet 2012 yang menjadikan tahun 2012 sebagai tahun Gerakan Inovasi Nasional perlu disahut oleh setiap ahli akademik.

“Selaras dengan hasrat ini kerajaan telah mengatur beberapa inisiatif strategik dengan peruntukan RM100 juta untuk tujuan menggalakkan amalan dan budaya inovasi di kalangan rakyat termasuk pelaksanaan program penerapan dan pembangunan inovasi di Institut Pengajian Tinggi Awam (IPTA),” kata Muhyiddin ketika merasmikan Majlis Anugerah Akademik Negara 2009 dan 2010 di Pusat Dagangan Dunia Putra.

Jelas Muhyiddin, mana-mana ahli akademik yang mempunyai kepakaran dalam pelbagai bidang dapat merebut peluang keemasan dan menjadi pelopor kepada Gerakan Inovasi Nasional.

“Sehubungan itu, adalah menjadi harapan kerajaan agar ahli-ahli akademik dapat menterjemahkan hasil penyelidikan dan pembangunan menjadi produk yang bernilai komersial.

“Dalam mencapai hasrat ini saya juga menyeru sektor swasta agar tampil untuk bekerjasama dengan IPT tempatan untuk mengadakan inovasi produk baru yang berpotensi menganjak rantaian nilai ekonomi negara kita ke tahap yang lebih tinggi,” katanya.

Selain itu, Muhyiddin juga meminta ahli akademik agar memelopori penyelidikan berimpak tinggi dan menjadikan inovasi sebagai paksi budaya berprestij tinggi.

Pada Majlis Anugerah Akademik Negara 2009 dan 2010 itu, Prof Emeritus Tan Sri Omar Abdul Rahman dari Universiti Putra Malaysia (UPM) telah dipilih sebagai Tokoh Akademik Negara.

Selain Omar, 11 ahli akademik lain turut menerima anugerah di atas sumbangan mereka kepada negara.

The Malaysian Insider
Hakcipta © 2011 The Malaysian Insider
Source: <http://www.themalaysianinsider.com/bahasa/article/tpm-ahli-akademik-perlu-hasil-l-ebih-banyak-penemuan-baru/>